

# Tačerizam (ili zašto na esencijalnoj listi lijekova u BiH pod hitno moraju biti i Tide i testosteron..)

**E**, sad bih ja trebala onako slavodobitno da kažem – jesam li vam fino rekla? No, kako sam više puta na ovom mjestu istakla da nemam namjeru baviti se politikom, onda neću. Ili bih možda, ipak, trebala? Dakle, od našeg posljednjeg viđenja nije se bogzna šta dešavalo. Malo se pokušavala (s)rušiti federalna Vlada (neuspješno) i tabijatli se rušila zgrada federalne Vlade (puno uspješnije). Sve u svemu - količina sludenosti po glavi stanovnika je dosegla takve razmjere da se polako, ali sigurno pretvara u rušilačku energiju koja nepodnošljivo lako (a sigurno puno lakše i brže nego što to velika većina stanovnika BiH misli) može ovu zemlju gurnuti u socijalno - ekonomski požar koji će jednostavno spržiti sve što se ovdje postiglo od Rata naovamo. A onome ko misli da bi to u ovakvoj zemlji stalo samo na tome, sigurno nisu sve ovce na broju...

I onda mislim, a inspirirana izjavama federalnog premijera (intonacija glasa i ispoljena energija u izjavama dok nam ruše zgradu Vlade, nedoljivo su me podsjetile na jednu komšinicu, minderpuzu klasičnu, poznatoj uglavnom po tome što se peči i prenemaže dok priča temperamentom mrtvog konja...) da je možda vrijeme da se žene, ali zaoprave što bi rekli, uključe u politiku. Još kad bi našli neku bosansku Margaret Thatcher...

Sve me ovo podsjeća, naime, na prvi mandat poštovane baronese koja naslijedila katastrofalne probleme rudnika u Velikoj Britaniji. Rudnici su pravili velike gubitke i bili jedan od glavnih uzroka budžetskog deficita i njime generirane inflacije. No, moć i uticaj sindikata dotičnih rudnika je bio direktno proporcionalan veličini problema – što će reći – ogroman. Svako diranje u rudnike se dočekivalo na nož izjavama da su oni kičma industrijske revolucije i da Imperije ne bi bilo da nije bilo njih. I tako dalje i tako bliže... Ako i vas ovo na nešto podsjeća, mislimo na isto.

Politička teorija, a Boga mi i praksa, kaže da takve probleme mogu riješiti samo političari velikog kalibra sa dvije osobine i to:

- a) Moraju biti moralno i zakonski čisti kao zub lovačkog psa - kako to slikovito kaže engleska fraza
  - b) Moraju imati - hajde da damski kažem- dovoljnu količinu testosterona iliti petlju da se uhvate u koštac s takvim problemom
- Da bi, dakle, izliječili ovo naše (već valjda svima jasno) bolesno društvo trebaju nam, kao što rekoš na početku:
- a) **Tide** za izbjeljivanje prljavog veša naših političara
  - b) Hormonske injekcije testosterona da od minderpuza napravimo muškarce... Ili to, ili Tačerica! Šta prije dođe....

P.S. Ne moram podsjećati da su rudnici nakon velike borbe zatvoreni i na taj način postavljeni temelji za ogroman privredni rast Velike Britanije. Ali, nije moglo bez pendreka – samo da se zna.... **B**